

Headlines

1. उपराज्यपाल मनोज सिन्हा होरें आखेआ जे जम्मू-कश्मीर हुन आम चीजें कन्नै खुश नेई होंदा, एहू बड्डे सुखने दिखने दी हिम्मत करदा ऐ।
2. उपमुख्यमंत्री सुरिंद्र चौधरी होरें प्रधानमंत्री ग्राम सड़क योजना तैह्त्त कई महत्वपूर्ण सड़क परियोजनाएं दा वर्चुअल तरीके कन्नै नीहू पत्थर रक्खेआ।
3. केंद्री मंत्री डॉ. जितेंद्र सिंह होरें जम्मू-कश्मीर क्रिकेट टीम दे सदस्यें गी रणजी ट्रॉफी च ऐतिहासिक जित्त हासल करने पर सम्मानित कीता।
4. आई.सी.सी टी-20 विश्व कप दे फाइनल च अज्ज संज्ञा भारत दा मुकाबला न्यूजीलैंड कन्नै होग।
5. मौसम विभाग नै औंदे दिनें दरान पूरे जम्मू-कश्मीर च मौसम दी तब्दीली दी पेशगोई कीती ऐ।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

LG-Mediocrity

एहू आखदे होई जे जम्मू-कश्मीर हुन औसत दर्जे जा फही आम चीजें कन्नै खुश नेई होंदा ऐ ते एहू बड्डे सुखने दिखने दी हिम्मत करदा ऐ, लेफ्टिनेंट गवर्नर मनोज सिन्हा होरें अज्ज आखेआ जे पिछले किश बरें थमां इस प्रदेश च मते बदलाव होए न, जेदे कन्नै पारदर्शिता बदी ऐ। जम्मू दे सिद्दडा च भ्रष्टाचार बरोधी ब्यूरो दे मुख्यालय ते अवंतीपोरा च इस्सै ब्यूरो ए.पी.के.एस शाखा दा उद्घाटन करने परैत एल.जी होरें एक्स पर लिखेआ- एहू दौनें ईमारतां शड़ी स्टील, कच ते कंक्रीट दियां ईमारतां नेई न, सगुआं आम लोकें दी जिंदगी च पारदर्शी ते भ्रष्टाचार मुक्त केंद्र शासित प्रदेश दी इक्क बड्डी घोशणा ऐ।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

## Dy.CM Projects

प्रदेश दे उपमुख्यमंत्री सुरिंद्र चौधरी होरें जम्मू च पीडब्ल्यूडी दे गेस्ट हाउस च लग्गे दे इक कार्यक्रम दरान प्रधानमंत्री ग्राम सड़क योजना पी.एम.जी.एस.वाई तैह्त नेकें शिड़क परियोजनाएं दा वीडियो कांफ्रेंसिंग राएं उद्घाटन कीता। नींह पत्थर रखने मगरा उपमुख्यमंत्री श्री चौधरी होरें आखेआ जे उनेंगी खुशी ऐ जे जम्मू च तकरीबन 100 करोड़ रपे दियां परियोजनाएं दा उद्घाटन होआ ऐ ते नेकें दा कम्म रम्भ होने आह्ला ऐ।

<><><><><><>

## Jitender JK Range Team

प्रधानमंत्री हुंदे दफ्तरै च केंद्री राज्य मंत्री डॉ. जितेंद्र सिंह होरें इस बरै रणजी ट्रॉफी च ऐतिहासिक जित्त लेई जम्मू-कश्मीर दी क्रिकेट टीम दे मिम्बरें गी बधाई दिती ऐ। उन्दे कन्नै गल्ल करदे होई डॉ. जितेंद्र सिंह होरें आखेआ जे उं'दी इस उपलब्धि नै ना शड़ा इस क्षेत्र दे नौजवान समुदाय च जोश भरेआ ऐ, सगुआं इस गल्ला दी बी तस्दीक कीती ऐ जे प्रधानमंत्री नरेंद्र मोदी हुंदी अगुवाई आहली केंद्र सरकार तैह्त मौकें दे लोकतंत्रीकरण ते बरोबर मौके उपलब्ध होने पर नौजवानें च आसें-मेदें ते आत्मविश्वास दा संचार होआ ऐ। उनें टीम दे मिम्बरें गी जित्त हासल करने पर सम्मानित बी कीता।

<><><><><><>

## Women's Day Poonch

जिला प्रशासन पुंछ नै समाज कल्याण मैहकमे दे इक्क कार्यक्रम च अज्ज अंतरराष्ट्री महिला दिवस जोश, जज्बे कन्नै मनाया। एहदा मकसद महिलाएं दियें उपलब्धियें गी दस्सना ते उनेंगी बाइखितयार बनाने आस्तै रम्भी गेदियें बक्ख-बक्ख कल्याणकारी पहलें बारै जागरूक करना हा। पुंछ दे डी.सी अशोक कुमार शर्मा होरें कार्यक्रम दा उद्घाटन कीता ते जीवन दे हरेक क्षेत्र च महिलाएं गी सशक्त बनाने दे महत्वै पर जोर पाया। अपने संबोधन च उनें समाज च महिलाएं दी भूमिका दी सराहना कीती।

<><><><><><>

## Army-Marital Arts

भारती फौज नै पुंछ जिले च कब्जा रेखा पर तैनात जवानें ताई उंदी जिस्मानी तैयारी ते लड़ने दी समर्था गी बदाने आस्तै इक्क टकोह्दे मार्शल आर्ट्स ते काम्बैट सखलाई रम्भ कीती ऐ। सखलाई कार्जक्रम मार्शल आर्ट्स तकनीकें ते होर दुई जिस्मानी लड़ाई दे हुनर पर केंद्रित ऐ जेड़ी मुश्कल महौल च कम करने आहले फौजियें लेई अत्त लाजमी ऐ। अफसरें दस्सेआ जे इस पैहल दा मकसद आपरेशनें दरान आमने-सामने आहली लड़ाई दे हालात च असरदार तरीकें कन्नै मौका साम्भने ताई जवानें दी काबलियत गी तगड़ा करना ऐ।



## T-20 World Cup

मर्दे दे आई.सी.सी टी-20 विश्व कप दा खताबी मकाबला अज्ज अहमदाबाद दे नरेंद्र मोदी स्टेडियम च मजूदा चैंपियन भारत ते न्यूजीलैंड बश्कार खेडेआ जाह्ग। मैच शामी 7 बजे शुरू होग। भारत टी-20 विश्व कप दे फाइनल च चौथी बारी पुज्जा ऐ ते अज्ज ओह्दी कोश्ट एहू खताब रिकार्ड त्रीऽ बारी अपने नां करने दी होग। न्यूजीलैंड नै अजे धोड़ी इस प्रतियोगिता दा खताब इक बारी बी हासल नेई कीते दा ऐ, पर उआं ओहू दुई बारी एह्दे खताबी मकाबले च शामिल होने जा करदा ऐ। सूर्य कुमार यादव कप्तानी आहली भारती टीम नै पिछले वीरवार मुम्बई च खेडुे गेदे दुए सेमीफाइनल च इंग्लैंड गी 7 रन कन्नै हराइयै फाइनल च प्रवेश कीता हा जिसलै कि न्यूजीलैंड नै कोलकाता च दक्खन अफ्रीका गी 9 विकटें कन्नै हराया हा। मुख्मन्त्री उमर अब्दुल्ला ते उपमुख्मन्त्री सुरिंद्र चौधरी होरें टी-20 विश्व कप लेई भारती टीम गी शुभ कामना दिंदे होई मेद प्रगट कीती ऐ जे भारत इस खताब गी अपने कश रखने च कामयाब रौह्ग।



## Marriage Assistance Doda

समाज कल्याण विभाग आसेआ डोडा जिले च लागू कीती गेदी ब्याह शादियें आस्तै माली मदाद उपलब्ध करोआने सरबंधी योजना, गरीबी रेखा थमां हेठले परोआरें ते अंतोदय अन्न योजना आले परोआरें लेई बड़ी मददगार साबत हो'रदी ऐ कीजे एह्दे कन्नै आर्थिक तौरा पर कमजोर माता-पिता पर माली बोझ बड़ा मता घटी गेआ ऐ। इस योजना दे तैहत योग्य परोआरें दियें कुड़ियें दे ब्याह आस्तै माली मदाद दित्ती जंदी ऐ, जेह्दे कन्नै नां छड़ा गरीब परोआरें आस्तै ब्याह

दे खर्च च सखाल होई ऐ, सगुआं एह्दे कन्नै कुडिं दे जन्म प्रति समाज दे रवैये च बी सकारात्मक तब्दीली आई ऐ।

<><><><><><>

### CRPF-Camp

केंद्री रिजर्व पुलस बल सी.आर.पी.एफ दी 187 बटालियन नै अपने 87में स्थापना दिवस दे मौके पर उधमपुर दे बट्टल बालियां स्थित अपने बटालियन मुख्यालय च इक सेहत जांच ते रक्तदान शिविर दा सरिस्ता कीता। सी.आर.पी.एफ दे सिविक एक्शन प्रोग्राम-2026 तैहत आयोजित इस कैंप च सी.आ.पी.एफ दे कोई 40 अधिकारिं ते कर्मिं खून दान कीता ते आले-दोआले दे लोकें अपनी सेहत जांच करोआई जेह्दे च बी.पी ते शूगर दी जांच, ई.सी.जी, नजर दी जांच ते खून दे बक्ख-बक्ख चाल्ली दे टैस्ट शामिल हे। कैंप च मरीजें गी मुफ्त दोआइयां बी दित्तियां गेइयां।

<><><><><><>

### Weather

मौसम मैहकमे नै अज्जै थमां पूरे केंद्र शासित प्रदेश च मौसम दी स्थिति च बदलाव दी पेशनगोई कीती ऐ। 10 मार्च तगर बद्दल छाए दे रौहने ते बक्ख-बक्ख उच्चि धारें पर हल्की बरखा ते बर्फबारी दी मेद दस्सी दी ऐ।

<><><><><><>